

四庫全書

子部

欽定四庫全書

冊府元龜卷五百三十六 宋 王欽若等 撰

諫諍部

直諫第三

漢王章成帝時為京兆尹章素剛直敢言以為大將軍
王鳳建遣定陶興王之國非是廼奏封事言日蝕之咎
天子召見章延問以事章對曰天道聰明佐善而留惡
以瑞異為符效今陛下以未有繼嗣引近定陶王所以

承宗廟重社稷上順天心下安百姓此正議善事當有祥瑞何故致菑異菑異之發為大臣顓政者也今聞大將軍猥歸日蝕之咎於定陶王建遣之國苟欲使天子孤立於上顓擅朝事以便其私非忠臣也且日蝕陰侵陽臣顓君之咎今政事大小皆自鳳出天子曾不一舉手鳳不內省責反歸咎善人推遠定陶王且鳳誣罔不忠非一事也前丞相樂昌侯商本以先帝外屬內行篤有威重位歷將相國家柱石臣也其人守正不肯誣節

隨鳳委曲卒用閨門之事為鳳所罷身以憂死衆庶愍之又鳳知其小婦弟張美人已嘗適人於禮不宜配御至尊託以為宜子內之後宮苟以私其妻弟聞張美人未嘗任身就館也且羌胡尚殺首子以盪賜正世況於天子而近已出之女也此三者皆大事陛下所自見足以知其餘及它所不見者鳳不可令久典事宜退使就第選忠賢以代之自罷商後遣定陶王也上不能平及聞章言天子感悟納之謂章曰微京兆尹直言吾不聞社

稷計且唯賢知賢君試為朕求可以自輔者於是章奏封事薦中山孝王舅瑯琊太守馮野王以王舅出以賢復入明堂主樂賢也上自為太子時數聞野王先帝名卿聲譽出鳳遠甚方欲倚以代鳳而上以皇太后故章竟下獄而死

梅福成帝時為昌尉帝委任大將軍王鳳鳳專勢擅朝而京兆尹王章素忠直譏刺鳳為所誅王氏浸盛苗異數見羣下莫敢正言福上書曰臣聞箕子佯狂於殷而

為周陳洪範叔孫通適秦歸漢制作儀品夫叔孫先非不忠也箕子非疏其家而畔親也不可為言也昔高祖納善若不及從諫若轉圜聽言不求其能舉功不考其素陳平起於亡命而為謀主韓信拔於行陳而建上將故天下之士雲合歸漢爭進其異智者竭其策愚者盡其慮勇士極其節怯夫勉其死合天下之知并天下之威是以舉秦如鴻毛取楚若拾遺此高祖所以亡敵於天下也孝文帝起於代谷非有周召之師伊呂之佐也

循高祖之法加以恭儉當此之時天下幾平錄是言之
循高祖之法則治不循則亂何者秦為七道削仲尼之
迹滅周公之軌壞井田除五等禮廢樂隨王道不通故
欲行王道者莫能致其功也孝武皇帝好忠諫說至言
出爵不待蕪茂慶賜不須顯功是以天下布衣各厲志
竭精以赴闕廷自銜鬻者不可勝數漢家得賢於此為
盛使孝武皇帝聽用其計昇平可致於是積尸暴骨快
心胡越故淮南王安緣間而起所以計慮不成而謀議

泄者以衆賢聚於本朝故以大臣勢陵不敢和議也方

今布衣迺窺國家之隙見間而起者蜀郡是也

成帝鴻嘉中廣漢男子鄭

躬等反是也

及山陽亡徒蘓令之羣蹈藉名都大郡求黨與

索隨和而亡逃匿之意此皆輕量大臣無所畏忌國家之權輕故匹夫欲與上爭衡也是士者國之重器得士則重失士則輕詩云濟濟多士文王以寧廟堂之議非草茅所當言也臣誠恐身塗野草尸并卒伍故數上書求見輒報罷臣聞齊桓之時有以九九見者桓公不逆

欲以致大也今臣所言非特九九也陛下距臣者三矣
此天下士所以不至也昔秦武王好力任鄙叩關自鬻
繆公行伯繇余歸德今欲致天下之士民有上書求
見者輒使詣尚書問其所言言可採取者秩以升斗之
祿賜以一束之帛若此則天下之士發憤吐懣忠言嘉
謀日聞於上天下條貫國家表裏爛然可睹矣夫以四
海之廣士民之數能言之類至衆多矣然其雋傑指陳
世政言成文章質之先聖而不繆施之當世合時務若

此者亦亡幾人故爵祿束帛者天下之底石高祖所以
厲世摩鈍也孔子曰工欲善其事必先利其器至秦則
不然張無道之罔以為漢毆除倒持泰阿授楚其柄故
誠能勿失其柄羣下雖有不順莫敢觸其鋒此孝武皇
帝所以辟地建功為漢世宗也今不循伯者之道廼欲
以三代選舉之法取當世之士猶察伯樂之圖求騏驎
於市而不可得亦已明矣故高祖棄陳平之過而獲其
謀晉文召天王齊桓用其讎亡益於時不顧逆順此所

謂伯道者一色成體謂之醇白黑雜合謂之駁欲以承平之法治暴秦之緒猶以鄉飲酒之禮理軍市也今陛下既不納天下之言又加戮焉夫戴鵲遭害則仁鳥增逝愚者蒙戮則知士深退間者愚民上疏多觸不急之法或下廷尉而死者衆自陽朔以來天下以言為諱朝廷尤甚羣臣皆承順上指莫有執正何以明其然也取民所上書陛下之所善試下之廷尉廷尉必曰非所宜言大不敬以此下之一也故京兆尹王章資質忠直敢

面引廷爭孝元皇帝擢之以厲具臣而矯曲朝及至陛下戮其妻子且惡惡止其身王章非有反叛之辜而殃及家折直士之節結諫臣之舌羣臣皆知其非然不敢爭天下以言為戒最國家之大患也願陛下循高祖之軌杜亡秦之路數御十月之歌留意亡逸之戒除不急之法下亡諱之詔博覽兼聽謀及疏賤令深者不隱遠者不塞所謂闢四門明四目也且不急之法誹謗之微者也往者不可及來者猶可追方今君命犯而主威奪

外戚之權日以益隆陛下不見其形願察其景建始以來日蝕地震以率言之三倍春秋水苗亡與此數陰盛陽衰金鐵為飛此何景也漢興以來社稷三危呂霍上官皆母后之家也親親之道全之為右當與之賢師良傳教以忠孝之道今廼尊寵其位授以魁柄使之驕逆至於夷滅此失親親之大者也自霍光之賢不能為子孫慮故權臣易世則危書曰毋若火始燄燄勢陵於君權隆於上然後防之亦亡及已上遂不納成帝久立

繼嗣福以為宜建三統封孔子之世以為殷後復上書
曰臣聞不在其位不謀其政政者職也位卑而言高者
罪也越職觸罪危言世患雖伏質橫分臣之願也守職
不言沒齒身全死之日尸未腐而名滅雖有景公之位
伏歷千駟臣不貪也故願一登文石之陛赤墀之塗當
戶牖之法坐盡平生之愚慮亡益於時有遺於世此臣
寢所以不安食所以忘味也願陛下深省臣言臣聞存
人所以自立也壅人所以自塞也善惡之報各如其事

昔者秦滅二周夷六國隱士不顯佚民不舉絕三統滅天道是以身危子殺厥孫不嗣所謂壅人以自塞者也故武王克殷未下車存五帝之後封殷於宋紹夏於杞明著三統示不獨有也是以姬姓半天下遷廟之主流出於戶所謂存人以自立者也今成湯不祀殷人亡後陛下繼嗣久微殆為此也春秋經曰宋殺其大夫穀梁傳曰其不稱名姓以其在祖謂尊之也此言孔子故殷後也雖不正統封其子孫以為殷後禮亦宜之何者諸

侯奪宗聖庶奪嫡傳曰賢者子孫宜有土而况聖人又
殷之後哉昔成王以諸侯禮葬周公而皇天動威雷風
著菑畱仲尼之廟不出闕里孔氏子孫不免編戶以聖
人而歆匹夫之祀非皇天之意也今陛下誠能據仲尼
之素功以封其子孫則國家必獲其福又陛下之名與
天亡極何者追聖人素功封其子孫未有法也後聖必
以為則不滅之名可不勉哉福孤遠又譏切王氏故終
不見納

杜業封建平侯哀帝即位業上書言王氏世權日久朝
無骨鯁之臣宗室諸侯微弱與繫囚無異自佐史以上
至於太史皆權臣之黨曲陽侯根前為三公輔政知趙
昭儀殺皇子不輒白奏反與趙氏比周恣意妄行讚頌
故許后被加以非罪誅破諸許族敗元帝外家內族妬
同產兄姊紅陽侯立及淳于氏皆老被放棄新喋血京
師威權可畏高陽侯薛宣有不養母之名安昌侯張禹
姦人之雄惑亂朝廷使先帝負謗於海內尤不可不慎

陛下初即謙讓未皇孤獨特立莫可據扶權臣易是意
若探湯宜蚤以義割恩安百姓心竊見諸博忠信勇猛
材畧不世出誠國家雄俊之賢臣也宜徵博置左右以
鎮天下此人在朝則陛下可高枕而卧矣昔諸呂欲危
劉氏賴有高祖遺臣周勃陳平尚存不者幾為姦臣笑
也

母將隆哀帝時為執金吾侍中董賢方貴帝使中黃門
發武庫兵前後十輩送董賢及上乳母王阿舍將隆奏

曰武庫兵器天下公用國家武備繕治造作皆度大司
農錢大司農錢自乘輿不以給供養勞賜一出少府蓋
不以本藏給末用不以民力共浮費別公私示正路也
古言諸侯方伯得額征伐迺賜斧鉞漢家邊吏職在距
寇亦賜武庫兵皆任其事然後蒙之春秋之誼家不藏
甲所以抑臣威損私力也今賢等便僻弄臣私恩微妾
而以天下之公用給其私門棄國威器共其家備民力
分於弄臣武兵設於微妾建立非宜以廣驕僭非所以

示四方也孔子曰奚取於三家之堂臣請收還武庫帝
不悅

鮑宣為諫議大夫時哀帝祖母傅太后欲與成帝母俱
稱尊號封爵親屬丞相孔光大司空師丹何武大司馬
傅喜始執正議失傅太后指皆免官丁傅子弟並進董
賢貴幸宣上書諫曰竊見孝成皇帝時外親持權人人
牽引所私以充塞朝廷妨賢人路濁亂天下奢泰亡度
窮困百姓是以日蝕且十彗星四起危亡之徵陛下所

親見也今奈何反復劇於前乎朝臣亡有大儒骨鯁白
首耆艾魁壘之士論議通古今喟然動心憂國如饑渴
者臣未見也敦外親小童及幸臣董賢等在公門省戶
下陛下欲與此共承天地安海內甚難今世俗謂不智者為
能謂智者為不能昔堯放四凶而天下服今除一吏而衆
皆惑古刑人尚服今賞人反惑請寄為姦羣小日進國
家空虛用度不足民流亡去城郭盜賊並起吏為殘賊
歲增於前凡民有七七陰陽不和水旱為菑一亡也縣

官重責更賦租稅二七也貪私七公受取不已三七也
豪彊大姓蠶食亡厭四七也苛吏繇役失農桑時五七
也部落鼓鳴男女遮迤六七也盜賊劫掠取民財物七
七也七亡尚可又有七死酷吏毆殺一死也治獄深刻
二死也冤陷無辜三死也盜賊橫發四死也怨讎相殘
五死也歲惡饑饉六死也時氣疾疫七死也民有七亡
而無一得欲望國安誠難民有七死而無一生欲望刑
措誠難此非公卿守相貪殘成化之所致邪羣臣等幸

得居尊官食重祿豈有肯加惻隱於細民助陛下流教化者邪志但在營私家稱賓客為姦利而已以苟容曲從為賢以拱默尸祿為智謂如臣宣等為愚陛下擢臣巖穴誠冀有益毫毛豈徒欲使臣美食大官重高門之地哉天下乃皇天之天下也陛下上為皇天子下為黎庶父母為天牧養元元視之當如一合鳴鳩之詩今貧民菜食不厭衣又穿空父子夫婦不能相保誠可為酸鼻陛下不救將安所歸命乎奈何獨私養外親與

幸臣董賢多賞賜以千萬數奴從賓客漿酒藿肉

視酒如漿

視肉如藿也

蒼頭廬兒皆用致富非天意也及汝昌侯傅商

亡功而封夫官爵非陛下之官爵也陛下取非其官官

非其人而望天說民服豈不難哉方陽侯孫寵宜陵侯

息夫躬辨足以移衆彊可用獨立姦人之雄惑世尤劇

者也宜以時罷退及外親幼童未通經術者皆宜令休

就師傅急徵故大司馬傅喜使領外親故大司空何武

師丹故丞相孔光故左將軍彭宣經皆更博士位皆歷

三公知謀威信可與建教化圖安危龔勝為司直郡國皆慎選舉三輔委輸官不敢為奸可大委任也陛下前以小不忍退武等海內失望陛下尚能容亡功德者甚衆曾不能忍武等邪治天下者當用天下之心為心不得自尊快意而已也上之皇天見譴下之庶黎怨恨次有諫諍之臣陛下苟欲自薄而厚惡臣天下猶不聽臣雖愚顛獨不知多受祿賜美食大官廣田宅厚妻子不與惡人結仇怨以安身邪誠迫大義官以諫諍為職

不敢不竭愚惟陛下少留神明覽五經之文原聖人之

至意深思天地之戒臣宣訥鈍於辭不勝惓惓盡死節

而已帝以宣明儒優容之是時郡國地震民訛言行籌是時

民驚走持藁或麻幹一技相傳日行詔明年正月朔日蝕帝乃徵孔光免

孫寵息夫躬罷侍中諸曹黃門郎數十人宣又上書曰

陛下父事天母事地子養黎民即位已來父虧明母震

動子訛言相驚焉恐今日蝕於三始正月一日為歲之朝月之朝日之朝始曰

朝也誠可畏懼小民正月朔日尚恐毀敗器物何況於日

虧乎陛下深內自責避正殿舉直言求過失罷退外親
及旁仄素餐之人徵拜孔光為光祿大夫發覺孫寵息
夫躬過惡免官遣就國衆庶歛然莫不說喜天人同心
人心說則天意解矣乃二月丙戌白虹軒日連陰不雨
此天有憂結未解民有怨望未塞者也侍中駙馬都尉
董賢本無葭莩之親葭莩喻輕薄而附著也但以令色諛言自進

令善也
諛誦也

賞賜無度竭盡府藏并合三第尚以為小復壞

暴室

時以三第摠為一第賜賢猶嫌陋
小復取暴室之地以增益之也

賢父子坐使天

子使者將作治第行夜吏卒皆得賞賜

為賢第上時
時行夜者

上冢有會輒大官為供海內貢獻當養一君今反盡之
賢家豈天意與民意邪天不可久負厚之如此反所以
害之也誠欲哀賢宜為謝過天地解讎海內免遣就國
收乘輿器物還之縣官如此可以父子終其性命不者
海內之所仇未有得久安者也孫寵息夫躬不宜居國
可皆免以視天下復徵何武師丹彭宣傳喜曠然使民
易視以應天心

易改也

建立大政以興太平之端高門去

省戶數十步求見出入二年未省

不被省視也

欲使海瀕

陋自通遠矣

瀕涯也

願賜數刻之間

刻漏刻也間空隙也

極竭

之思

髦髦猶蒙蒙也如淳曰謹厚之貌也

退入三泉死亡所恨

三重之泉言其深也

帝大感異納宣奏

鄭崇字子游哀帝擢為尚書僕射數求見諫諍帝初

納用之每見曳革履帝笑曰我識鄭尚書屨聲久之

帝欲封祖母傳太后從弟商宗諫曰孝成皇帝封親舅

五侯天為赤黃晝昏日中有黑氣今祖母從昆弟二人

已戾孔卿皇后父為高武侯以三公封尚有因緣今無

故欲復封商壞亂制度逆天人心非傅氏之福也臣聞

師曰逆陽者厥極凶短折犯人者有亂亡之患犯神者

有疾夭之禍故周公著戒曰惟王不知艱難唯耽樂是

從時亦罔有克壽

周書七逸之篇也

故衰世之夭折蚤沒此皆

犯陰之害也臣願以身命當國咎崇因持詔書案起

業即厲詔之文傅太后大怒曰何有為天子乃反為一臣所顯

制邪帝竟封焉崇又以董賢事貴寵過度諫繇是

重得罪數以職事見責

後漢譙玄巴郡人成帝時為議郎帝始作期門數為微行立趙飛燕為皇后后專寵懷忌皇子多橫夭折玄上書諫曰臣聞王者承天繼宗統極保業延祚莫急裔嗣故易有幹蠱之義詩詠衆多之福今陛下聖嗣未立天下屬望而不惟社稷之計專於微行之事愛幸用於所惑曲意留於非正竊聞後宮皇太子產而不育臣聞之怛然痛心傷剝竊懷憂國不忘須臾夫警言衛不修

則患生非常忽有醉酒狂夫分爭道路既無尊嚴之儀
豈識上下之別此為胡狄起於轂下而賊亂發於左右
也願陛下念天下之至重愛金玉之身均九女之施存
無窮之福天下幸甚銑期為衛尉光武嘗輕輿期門近
出期頓首車前曰臣聞古今之戒變生不意誠不願陛
下微行數出帝為之回輿而還

鄧暉為上東城門侯光武嘗出獵車駕夜還暉拒關不
開乃從東門入明日暉上書諫曰昔文王不敢繫于游

田以萬人為憂而陛下遠獵上林夜以繼晷其如社稷宗廟何暴虎馮河未至之戒誠小臣所竊憂也書奏賜布百匹貶東中門侯為參封尉蔡茂為廣漢太守時雒陽令董宣舉糾湖陽主光武始怒收宣既而赦之茂喜宣剛正欲令朝廷禁制貴戚乃上書曰臣聞興化致教必繇進善康國寧人莫大理惡陛下聖德係興再隆大命即位以來四海晏然誠宜夙興夜寐雖休勿休然頃者貴戚椒房之家數因恩勢干犯吏禁殺人不死傷人

不論臣恐繩墨棄而不用斧斤廢而不舉近湖陽公主
奴殺人西市而與主共輿出入宮省逋罪積日寃魂不
報雒陽令董宣直道不顧于主討姦陛下不先證審詔
欲加箠當宣受怒之初京師側耳及其蒙宥天下拭目
今者外戚僞逸賓客放濫宜勅有司案理姦罪使執平
之吏永申其用以厭遠近不緝之情光武納之

鄭興為大中大夫建武七年三月晦日蝕興上疏曰春
秋以天反時為菑地反物為妖人反德為亂亂則妖菑

生往年以來謫咎連見意者執事頗有闕焉案春秋昭公十七年夏六月甲戌朔日有食之傳曰日過分而未

至三辰有苗於是百官降物君不舉避移時

避正寢過日食時也

樂用鼓祝用幣史用辭今孟夏純乾用事陰氣未作其苗尤重夫國無善政則謫見日月變咎之來不可不慎其要在因人之心擇人處位也堯知鯀不可用而用者是屈己之明因人之心也齊桓反政而相管仲晉文歸國而任卻穀者是不私其私擇人處位也今公卿大夫

多舉漁陽太守郭伋可大司空者而不以時定道路流言或曰朝廷欲用功臣功臣用則人位繆矣願陛下上師唐虞下覽齊晉以成屈已從衆之德以濟羣臣讓善之功夫日月交會數應在朔而頃年日蝕每多在晦先時而合昏月行疾也日君象而月臣象君亢急則臣下促迫故行疾也今年正月繁霜自爾以來率多寒日此亦急咎之罰天於賢聖之君猶慈父之於孝子也丁寧申戒欲其反政故菑變仍見此乃國之福也今陛下高

明而羣臣惶促宜留思柔克之政垂意洪範之法博採
廣諫羣下之策書奏多有所納

桓譚為議郎給事中時光武信讖多以決定嫌疑又醜

賞少薄天下不時安定譚上疏曰前獻瞽言未蒙詔報

臣欽若等曰譚先上疏陳
時政所宜事具規諫門

不勝憤懣冒死復陳愚夫策

謀有益於正道者以合人心而得事理也凡人情忽於
見事而貴於異聞觀先王之所記述咸以仁義正道為
本非有竒怪虛誕之事蓋天道性命聖人所難言也自

子貢以下不得而聞況後世淺儒能通之乎今諸巧慧
小才伎數之人增益圖書矯稱識記以欺惑貪邪誣誤
人主焉可不抑遠之哉臣譚伏聞陛下窮折方士黃白
之術甚為明矣而乃欲聽納識記又何誤也其事雖有
時合譬猶卜數雉偶之類陛下宜垂明聽發聖意屏羣
小之曲說述五經之正義畧雷同之俗語解通人之雅
謀又臣聞安平則尊道術之士有難則貴介胄之臣今
聖朝興復祖統為人臣主而四方盜賊未盡歸伏者此

權謀者未得也臣譚伏觀陛下用兵諸所降下既無重賞以相思誘或至虜掠奪其財物是以兵長渠率各生狐疑黨輩連結歲月不解古人有言曰天下皆知取之為取而莫知與之為取陛下誠能輕爵重賞與士共之則何招而不至何說而不釋何向而不開何征而不尅如此則能以狹為廣以遲為速亡者復存失者復得矣帝省奏愈不悅

陳元以才高著名辟司空李通府時大司農江馮上言

宜令司隸校尉督察三公事下三府元上疏曰臣聞師
臣者帝賓臣者霸故武王以太公為師齊桓以夷吾為
仲父孔子曰百官摠已聽冢宰近則高帝優相國之禮
太宗假宰輔之權及亡新王莽遭漢中衰專操國柄以
偷天下況已自喻不信羣臣奪公輔之任損宰相之威
以刺舉為明徼訐為直至乃陪僕告其君長子弟變其
父兄罔密法峻大臣無所措手足然不能禁董忠之謀
身為世戮故人君患在自驕臣失在自任不在任人是

以文王有日昃之勞周公執吐握之恭不聞其宗刺舉
務篤察也方今四方尚擾天下未一百姓觀聽或張耳
目陛下宜修文武之聖典襲祖宗之遺德勞心下士屈
節待賢誠不宜使有司察公輔之名帝從之宣下其議
楊終為蘭臺校書章帝建初元年大旱穀貴終以為
廣陵楚淮陽濟南之獄徒者萬數又遠屯絕域吏民
怨曠乃上疏曰臣聞善善及子孫惡惡止其身百王帝
典不易之道也秦政酷烈違誤天心一人有罪延及三

族高祖平亂約法三章太宗至仁除去收斂萬姓廓然
蒙被更生澤及昆蟲功垂萬世陛下聖明德被四表今
以比年久旱苗稼未息躬自菲薄廣訪失得三代之
隆無以加焉臣切按春秋水旱之變皆應暴急惠不
下流自永平以來仍連大獄有司窮考轉相牽引掠拷
寃濫家屬徙邊加以北征匈奴西開三十六國頻年服
役轉輸煩費又遠屯夷吾樓蘭車師戊巳民懷土思
歸怨結邊域傳曰安土重居謂之衆庶昔殷民近遷

雜邑且猶怨望何況去中國之肥饒寄不毛之荒極乎
且南方暑濕瘴毒互生愁困之民足以感動天地移
變陰陽矣陛下留念省察以濟元元書奏帝下其章司
空第五倫亦同終議太尉牟融司徒鮑昱校書郎班固
等難論以施行既久孝子無改父之道先帝所建不宜
回異終復上書曰秦築長城功役繁興胡亥不革卒亡
四海故孝元棄珠崖之郡光武絕西域之國不以介鱗
易我衣裳魯文公毀泉臺春秋譏之曰先祖為之而

已毀之不如勿居而已以其無妨害於民也襄公作三軍昭公舍之君子大其復古以為不舍則有害於民也今夷吾之役樓蘭之屯久而未還非天意也帝從之聽還徙者悉罷邊屯

宋意為尚書章帝性寬仁而親親之恩篤故叔父濟南中山二王每數入朝特加恩寵及諸昆弟並留京師不遣就國意以為人臣有節不宜踰禮過恩乃上疏諫曰陛下至孝烝烝恩愛隆深以濟南王康中山王焉先帝

昆弟特蒙禮寵聖情戀戀不忍遠離比年朝見久留京師崇以叔父之尊同之家人之禮車入殿門即席不拜分甘損膳賞賜優渥昔周公懷聖人之德有致太平之功然後王曰叔父加以錫幣今康焉幸以支庶享食大國陛下即位蠲除前過還所削黜衍食屯縣男女少長並受爵邑恩寵踰制禮敬過度春秋之義諸父昆弟無所不臣所以尊尊卑卑彊幹弱枝者也陛下德業隆盛當為萬世典法不宜以私恩損上下之序失君臣之正

又西平三羨等六王皆妻子成家官屬備具當早就藩
國為子孫基趾而室第相望久盤京邑婚姻之盛過於
本朝僕馬之衆充塞城郭驕奢僭擬寵祿隆過今諸國
之封並皆膏腴風氣平調道路夷近朝聘有期行李不難
且割情不忍以義斷恩發遣康焉各歸藩國今羨等速
就便時以塞衆望帝納之

魯恭為侍御史和帝初立議遣車騎將軍竇憲與征
西將軍耿秉擊匈奴恭上疏諫曰陛下親勞聖恩日昃

不食愛在軍役誠欲以安定兆庶為人除患定萬世之計也臣伏獨思之未見其便社稷之計萬人之命在於一舉數年以來秋稼不熟人食不足倉庫空虛國無畜積會新遭大憂人懷恐懼陛下躬大聖之德履至孝之行盡諒陰三年聽於冢宰百姓闕然三時不聞警蹕之音莫不懷思皇皇若有求而不得今乃以盛春之月興發軍役擾動天下以事戎夷誠非所以垂恩中國改元正時繇內及外也萬民者天之所生天愛其所生猶父

母愛其子一物有不得所者則天氣為之舛錯況於人乎故愛人者必有天報昔大王重人命而去邠故獲上天之佑夫戎狄者四方之異氣也躡夷踞肆與鳥獸無別若雜居中國則錯亂天氣汙辱善人是以聖王之制羈縻不絕而已今邊境無事宜當修仁行義尚於無為令家給人足安業樂產夫人道又於下則陰陽和於上祥風時雨覆被遠方夷狄重譯而至矣易曰有孚盈缶終來有它吉言甘雨滿我之缶誠來有我而吉已夫以

德勝人者昌以力勝人者亡今匈奴為鮮卑所殺遠歲於史侯河南去塞數千里而欲乘其虛耗利其微弱是非義之所出也前太僕蔡彤遠出塞外卒不見一胡而兵已困矣白山之難不絕如繼都護陷沒士卒死者如積迄今被其辜毒孤寡哀思之心未弭仁者念之以為累恩奈何復欲襲其迹不顧患難乎今始徵發而大司農調度不足所以使者在道分部督趣上下相迫民間之急亦已甚矣三輔並涼州少雨麥根枯燠牛死日甚

此其不合天心之效也羣僚百官咸曰不可陛下獨奈何以一人之計棄萬人之命不卹其言乎上觀天心中察人志足以知事之得失臣恐中國不為中國豈徒匈奴而已哉惟陛下留聖恩休罷士卒以順天心書奏不從

何敞為侍御史時車騎將軍竇憲大發軍擊匈奴而詔使者為憲弟篤景並起邸第興造勞役百姓愁苦敞上疏諫曰臣聞匈奴之為桀逆久矣平城之圍慢書之恥

此二辱者臣子所為捐軀而必死高祖呂后忍怒還忿
舍而不誅伏惟皇太后秉文母之操陛下履晏晏之姿
匈奴無逆節之罪漢朝無可慙之恥而盛春東作興動
大役元元怨恨咸懷不悅而猥復為衛尉篤奉車都尉
景繕修館第彌街絕里臣雖斗筭之人誠竊懷怪以為
篤景親近貴臣當為百僚表儀今衆軍在道朝廷焦唇
百姓愁苦縣官無用而遽起大第崇飾玩好非所以垂
令德示無窮也宜且罷工匠專憂北邊恤人之困書奏

不省後拜為尚書復上封事曰夫忠臣憂世犯主嚴言
譏刺貴臣至以殺身滅家而猶為之者何邪君臣義重
有不得已也臣伏見往事國之危亂家之將凶皆有所
由較然易知昔鄭武姜之幸叔段衛莊公之寵州吁愛
而不教終至凶戾由是觀之愛子若此猶饑而食之以
毒適所以害之也伏見大將軍憲始遭大憂公卿比奏
欲令典幹國事憲深執謙退固辭盛位懇懇勤勤言
之深至天下聞之莫不悅喜今踰年無幾大禮未終卒

然中改兄弟專朝憲秉三軍之重篤景控宮衛之權而
虐用百姓奢侈僭倂誅戮無罪肆心自快今者論議凶
凶咸謂叔段州吁復生於漢臣觀公卿懷持兩端不肯
極言者以為憲等若有匪懈之志則已受吉甫褒申伯
之功如憲等陷於罪辜則自取陳平周勃順呂后之權
終不以憲等吉凶為憂也臣敞區區誠欲計策兩安絕
其綿綿塞其涓涓上不欲令皇太后損丈母之號陛下
有哲言泉之譏下使憲等得長保其福祐然臧獲之謀上

安主父下存主母猶不免於嚴怒臣伏惟累祖蒙恩迄
臣八世復以愚陋旬年之間歷顯位備機近每念厚德
忽然忘生雖知言必夷滅而冒死自盡者誠不忍目見
其禍而懷默苟全駙馬都尉瓌雖在弱冠有不隱之忠
比請退身願抑家權可與參謀聽順其意誠宗廟至
計竇氏之福也

樂恢為尚書僕射竇憲兄弟放縱恢上疏諫曰臣聞百
王之失皆繇權移於下大臣持國嘗以執盛為咎伏念

先帝聖德未永早棄萬國陛下富於春秋纂承大業
諸舅不宜幹正王室以示天下之私經曰天地垂立衆物
天傷君臣失序萬人受殃政失不救其極不測方今之
宜上以義自割下以謙自引四舅可長保爵土之榮皇
太后永無慙負宗廟之憂誠策之上者也書奏不省時
竇太后臨朝和帝未親萬機恢以意不得行乃稱疾乞
骸骨詔賜錢太醫視疾恢薦任城郭城均陽高鳳而遂
稱篤拜騎都尉上書辭謝曰臣受厚恩無以報效夫政

在大夫孔子所疾世卿持權春秋以戒聖人懇惻不虛
言也近世外戚富貴必有驕溢之敗今陛下思慕山陵
未遑政事諸舅寵盛權行四方若不能自損誅罰必加
臣壽命垂盡臨死竭愚惟留神詔聽上印綬乃歸鄉里
唐羗和帝時為臨武長交州舊以龍眼荔支及生鮮獻
之驛馬晝夜傳送之至有遭虎狼毒害頓仆死亡不
絕道經臨武羗上書諫曰臣聞上不以滋味為德下不
以貢膳為功故天子食大牢為尊不以果實為珍伏

見交趾七郡獻生龍眼等馬駭風發南州土地惡蟲
猛獸不絕於路至於觸犯死亡之害死者則不可復生
來者猶可救也此二物升殿未必延年益壽帝從其奏
而罷之

翟酺為尚書安帝始親政事追感祖母宋貴人悉封其
家又元舅耿寶及皇后兄弟閭顯等並用威權酺上
疏諫曰臣聞微子佯狂而去殷叔孫通背秦而歸漢彼
非自踈其君時不可也臣荷殊絕之恩蒙值不諱之政

豈敢雷同受寵而以戴天履地伏惟陛下應天履祚歷
值中興當建太平之功而未聞致化之道蓋遠者難明
請以近事徵之昔竇鄧之寵傾動四方兼官重紱盈金
積貨至使議弄神器改更社稷豈不以勢尊威廣以致
斯患乎及其破壞頭顱墮地願為孤豚豈可得哉夫致
貴無漸失必暴受爵非道殃必疾今外戚寵幸功均
造化漢元以來未有等比陛下誠仁恩周洽以親九族然
祿去公室政移私門覆車重尋寧無摧折而朝臣在

位莫肯正議翕翕訾訾更相佐附臣恐威權外假歸
之良難虎翼一奮卒不可制故孔子曰珠吐於澤誰能
不舍老子稱國之利器不可以示人此最安危之極戒
社稷之深計也夫儉德之恭政存約節故文帝愛百金
於露臺飾帷帳於皂囊或有譏其儉者上曰朕為天
下守財耳豈得妄用之哉至倉穀腐而不可食錢貫朽
而不可較今自初政已來日月未久費用賞賜已不可
算歛天下之財積無功之家帑藏單盡民物彫傷卒有

不虞復當重賦百姓怨叛既生危亂可待也昔成王立
政周公在前召公在後畢公在左史佚在右四子挾而
維之目見正容耳聞正言一日即位天下曠然言其法
度素定也今陛下有成王之尊而無四子之佐雖欲崇
雍熙致太平其可得乎自去年以來蓄譴頻數地拆天
隕高岸為谷修身恐懼則轉禍為福輕慢天戒則其
害彌深願陛下親自勞卹研精致思勉求忠貞之臣誅
遠佞諂之黨損玉堂之盛尊天爵之重割情欲之歡罷

晏私之好帝王圖籍陳列左右心存亡國所以失之鑒
觀興王所以得之庶菑害可息豐年可招矣書奏不
省而外戚寵臣咸惡之

陳忠為尚書僕射安帝數遣黃門常侍及中使伯榮

伯榮帝乳
母王煙女

往來甘陵而伯榮負寵驕蹇所經郡國莫不

迎為禮謁又霖雨積時河水涌溢百姓騷動忠上疏曰臣
聞位非其人則庶事不叙庶事不叙則政有得失政有
得失則感動陰陽妖變為應陛下每引菑自厚不責臣

司臣司狃恩莫以為負故天心未得隔并屢臻青冀之

域淫雨漏河徐岱之濱海水全溢充豫蝗蝻滋生

子也

荆揚稻收儉薄并涼二州羌戎叛戾加以百姓不足府帑

虛匱自西徂東杼柚將空臣聞洪範五事一曰貌貌以

恭恭作肅貌傷則狂而致常雨春秋大水皆為君上威

儀不穆臨蒞不嚴臣下輕慢貴倖擅權陰氣盛彊陽

不能禁故為淫雨陛下以不得親奉孝德皇園廟比遣


中使致敬甘陵朱軒駟馬相望道路可謂孝至矣然臣

竊聞使者所過威權翕赫震動郡縣王侯二千石至為
伯榮獨拜車下儀體上僭侔於人主長吏惶怖譴責或
邪諂自媚發人修道繕理亭傳多設儲峙徵役無度老
弱相隨動有萬計賂遺僕從人數百匹頓踣吁嗟莫不
叩心河間託叔父之屬清河有陵廟之尊及剖符大臣
皆猥為伯榮屈節車下陛下不問必以陛下欲其然也伯
榮之威重於陛下陛下之柄在於臣妾水菑之發必起
於此昔韓嫣託副車之乘受馳視之使江都誤為一拜

而媯受歐刀之誅臣願明主嚴天元之尊正乾剛之位
職事巨細皆任賢能不宜復令女使干錯萬機重察左
右得無石顯泄漏之姦尚書納言得無趙昌譖宗之詐
公卿大臣得無朱博阿傳之援外屬近戚得無王鳳害
商之謀若國政一繇帝命王事每決於已則下不得偏
上臣不得干君常雨大水必當霽止四方衆異不能為
害書奏不省時三府任輕機事專委尚書而苗青變
咎動輒免公台忠以為非國舊體上疏諫曰臣聞君使

臣以禮臣事君以忠故三公稱曰冢宰王者待以殊敬
在輿為下御坐為起入則參對而議政事出則監察而
董是非漢典舊事丞相所請靡有不聽今之三公雖當
其名而無其實選舉誅賞一繇尚書尚書見任重於三
公陵遲以來其漸久矣臣忠常獨不安是故臨事戰懼
不敢冗見有所興造冗見言不廣也又不敢希意同僚以謬平
典而誇讒日聞罪足萬死近以地震策免司空陳褒今
者留異復欲切讓三公昔孝成皇帝以妖星守心移咎

丞相使賁彞納說方進方進自引卒不蒙上天之福徒
乖宋景之誠故知是非之分較然有歸矣又尚書決事
多違故典罪法無例詆欺為先文峻言醜有乖章憲宜
責求其意剖而勿聽上順國典下防威福置方圓於規
矩審輕重於衡石誠國家之典萬世之法也



冊府元龜卷五百三十六

欽定四庫全書

子部
冊府元龜卷五百三十九

侍讀臣孫球覆勘

總校官庶吉士臣何思鈞

校對官中書臣張九鐔

謄錄監生臣胡念祖

欽定四庫全書

冊府元龜卷五百三十七

宋王欽若等撰

諫諍部

直諫第四

後漢張浩為廷尉安帝廢皇太子為濟陰王浩與太常桓焉太僕來歷廷諍之不能得浩退而上疏曰昔賊臣江充造構讒逆至令戾園興兵終及禍難後壺關三老一言上乃覺悟雖追前失悔之何逮今皇太子春秋方

始十歲未見保傳九德之義宜簡賢輔就成聖質書
奏不省

左雄為尚書令順帝初廢為濟陰王乳母宋娥與黃門
孫程等共議立帝帝後以娥前有謀遂封為山陽君邑
五千戶又封大將軍梁商子冀襄邑侯雄上封事曰夫
裂土封侯王制所重高皇帝約非劉氏不王非有功不
侯孝安皇帝封江京王聖等遂至地震之異永建二
年封陰謀之功又有日食之變數術之士咸歸咎於封

爵今青州饑虛盜賊未息民有乏絕上求廩貸陛下乾
乾勞思以濟民為務宜循古法寧靜無為以求天意以
消留異誠不宜追錄小恩虧失大曲帝不聽雄復諫曰臣
聞人君莫不好忠正而惡讒諛然而歷世之患莫不以
忠正得罪讒諛蒙倖者蓋聽忠難從諛易也夫刑罪
人情之所甚惡貴寵人情之所甚欲是以時俗為忠者
少而習諛者多故令人主數聞其美稀知其過迷而不
悟至於危亡臣伏見詔書顧念阿母舊恩欲特加顯賞

案尚書故事無乳母爵邑之制唯先帝時阿母王聖為
野王君聖造生讒賊廢立之禍生為天下所咀嚼死為
海內所歡快桀紂貴為天子而庸僕羞與為比者以
其無義也夷齊賤為匹夫而王侯爭與為伍者以其有
德也今阿母躬蹈約儉以身率下羣僚蒸庶莫不向
風而與王聖並同爵號懼違本操失其常願臣愚以為
凡人之心理不相遠其所不安古今一也百姓深懲王
聖傾覆之禍民萌之命危於累卵常懼時世復有此類

怵惕之念未離於心恐懼之言未絕於口乞如前議歲以千萬給奉阿母內足以盡恩愛之歡外可不為吏民所怪梁冀之封事非機急宜過菑田危之運然後平議可否會復有地震緱氏山摧之異雄復上疏曰先帝封野王君漢陽地震今封山陽君而京城復震專政在陰其菑猶大臣前後瞽言封爵至重王者可私人以財不可以官宜還阿母之封以塞尤異今冀已高議山陽君亦宜崇其本節雄言雖切至我亦畏懼辭讓而帝戀戀

不能已卒封之後阿母遂以交構失爵

黃瓊為尚書僕射順帝時連有菑異瓊上疏曰間者
以來封位錯謬寒燠相干蒙氣數興日暗月散原之天
意殆不虛然陛下宜開石室案河雒外命史官悉條上
永建以前至漢初菑異與永建以後訖于今日孰為多
少又使近臣儒者參考政事數見公卿察問得失諸無
功德者宜皆斥黜

張綱為侍御史時順帝委縱宦官有職危心綱嘗感激

慨然歎曰穢惡滿朝不能奮身出命掃國家之難雖
生吾不願也退而上書曰詩曰不愆不忘率繇舊章
尋大漢初隆及中興之世文明二帝德化尤盛觀其理
易循易見但恭儉守節約身尚德而已中官常侍不過
兩人近倖賞賜裁滿數金惜廢重人故家給人足夷
狄聞中國優富信任道德所以姦謀自消而和氣感應
而頃者以來不遵舊章無功小人皆有爵官富之驕之
而復害之非愛人重器承天順道者也伏願陛下少

留聖恩割損左右以奉天心書奏不省

胡廣為尚書僕射時順帝欲立皇后而貴人有寵者
四人莫知所建議欲探籌以決定選廣與尚書郭虔史
敞上䟽諫曰竊見詔書以立后事大謙不自專欲假之
籌策決疑靈神篇籍所記祖宗典故未嘗有也恃神
任筮既不必當賢就值其人猶非德選夫岐嶷形於自
然倪天必有異表宜參良家簡求有德德鈞以年年
鈞以貌稽之典經斷之聖慮政令猶汗往而不反詔文

一下形之四方臣職在拾遺憂深責重是以焦心冒昧
陳聞帝從之以梁貴人良家子定立為皇后

楊倫為侍中順帝時邵陵令任嘉在職貪穢因遷武威
太守後有司奏嘉贓罪千萬徵考廷尉其所牽染將相
大臣百有餘人倫乃上書曰臣聞春秋誅惡及本本誅
則惡消振裘持領領正則毛理今任嘉所生狼籍未
受辜戮猥以垢身改典大郡自非案坐舉者無以禁絕
姦萌往者湖陸令張疊蕭令四賢徐州刺史劉福等釁

穢既彰咸伏其誅而豺狼之吏至今不絕者豈非本舉之主不加之罪乎昔齊威之霸殺姦臣五人并及舉者以弭謗譖當斷不斷黃石所戒夫聖王所以聽僮夫匹婦之言者猶塵加嵩岱霧集淮海雖未有益不為損也惟陛下留神省察奏御有司以倫言公直辭不遜順下之尚書奏倫探知密事徼以求直坐不敬結鬼薪結正其罪鬼薪取薪以詔書以倫數進忠言特原之免歸田給宗廟三歲刑之

里

郎顛舉有道不就順帝陽嘉二年正月就徵公車時災
異屢見顛乃詣闕拜章曰臣聞天垂妖象地見災符所
以譴告人主責躬修德使正機平衡流化興政也易內
傳曰凡災異所生各以其政變之則除消之亦除伏惟陛
下躬日昃之聽溫三省之勤思過念舊務消祇悔方今
時俗奢佚淺恩薄義夫救奢必於儉約拯薄無若敦厚
安上理人莫善於禮修禮遵約蓋惟上興革文變薄事
不在下故周南之德關雎政本本立道生風行草從澄

其源者流清溷其本者末濁天地之道其猶鼓籥以
虛為德自近及遠者也伏見往年以來園陵數災炎光
熾猛敬驚動神靈易天人應曰君子不思遵利茲謂無
澤厥災孽火燒其宮又曰君高臺府犯陰侵陽厥災火又
曰上不儉下不節災火並作燒君室自頃繕理西苑修
復太學宮殿官府多所構飾昔盤庚遷殷去奢即儉
夏后卑室盡力致美又魯人為長府閔子曰仍舊貫何
必改作臣愚以為諸所繕修事可省減京卹貧人賑

瞻孤寡此天之意也人之慶也仁之本也儉之要也焉
有應天養人為仁為儉而不降福者哉土者地祇陰性
澄靜宜以施化之時敬而勿擾竊見正月以來陰闇連
日易內傳曰久陰不雨亂氣也蒙之比也蒙者君臣上
下相冒亂也又曰欲德不用厥異常陰夫賢者化之本
雲者雨之具也得賢而不用猶久陰而不雨也又頃前
數日寒過其節冰既解釋還復凝合夫寒往則暑來
暑往則寒來此言日月相推寒暑相避以成物也今立

春之後火卦用事當溫而寒違反時節繇功賞不至而
刑罰必加也宜須立秋順氣行罰臣伏案非候叅察衆
政以為立夏之候當有震裂涌水之害又比熒惑失度
盈縮往來涉歷輿鬼環繞軒轅火精南方夏之政也政
有失禮不從夏令則熒惑失行正月三日至乎九日三
公卦三公上應台阶下同元首政失其道則寒陰反節
節彼南山詠自周詩股肱良哉著於虞典而今之在位
竟託高虛納累鍾之奉忘天下之憂棲遲偃仰寢疾自

逸被策文得賜錢即復起矣何疾之易而愈之速以
此消夫災眚興致升平其可得乎今選舉牧守委任
三府長吏不良既咎州郡州郡有失豈得不歸責舉者
而陛下崇之彌優自下慢事愈甚所謂大綱疏小網數
三公非臣之仇臣非狂夫之作所以發憤忘食懇懇不
已者誠念朝廷欲致興平非不能面譽也臣生長草野
不曉禁忌披露肝膽書不擇言伏鑽鼎鑊死不敢恨
謹詣闕奉章伏待重誅書奏帝復使對尚書顛對

曰臣聞明王聖主好聞其過忠臣孝子言無隱情臣備
生人倫視聽之類而稟性愚戇不識忌諱故出死忘命
懇懇重言誠欲陛下修乾坤之德開日月之明披圖
籍案經典覽帝王之務識先後之政如有闕遺退而
自改本文武之業擬堯舜之道攘災延慶號令天下此
誠臣顛區區之願夙夜夢寐盡心所計謹修序前章暢
其旨趣條便宜七事具如狀對一事陵園至重聖神攸
馮而災火炎赫迫近寢殿魂而有靈猶將驚動宮殿官

府近始永平歲時未積便更修造又西苑之設禽畜是
處離房別觀本不常居而皆當修積土木營建無已消
功殫賄巨億為計易內傳曰人君奢侈多飾宮室其時
旱其災火是故魯僖遭旱修政自勅下鐘鼓之懸休
繕治之官雖則不寧而時雨自降繇此言之天之應人
敏於影響敏速也今月十七日戊午徵日也日加申風從
寅來丑時而止丑寅申皆徵也不有火災必當為旱願
陛下較計繕修之費永念百姓之勞罷將作之官減

雕文之飾損庖厨之饌退宴私之樂易中孚傳曰陽感

天不旋日

易中孚傳曰陽感天不旋日言天子為善一日天立應以善為惡一日天立應以惡也

如是則景雲降集青珍息矣二事去年以來兌卦用事

類多不效易傳曰有貌無實佞人也有實無貌道人也

寒温為實清濁為貌今三公皆令色足恭外厲內荏以

虛事上無佐國之實故清濁效而寒温不效也是以陰

寒侵犯消息

陽君陰臣侵消息者或陰專政或陰侵陽也

占曰日乘則有妖

風日蒙則有地裂如是三年則致日食陰侵其陽漸積所

致立春前後溫氣應節者詔令寬也其復寒者無寬之
實也夫十室之邑必有忠信率土之人豈無貞賢未聞
朝廷有所賞拔非所以求善贊務弘濟元元宜採納良
臣以助聖化三事臣聞天道不遠三五復反今年少陽
之歲法當乘起恐後年已往將遂驚動涉歷天門災成
戊巳今春當旱夏必有水臣以六日七分候之可知夫
災眚之來緣類而應行有玷缺則氣逆於天精感變出
以戒人君王者之義時有不登則損滋徹膳數年以來

穀收稍減家貧戶饑歲不如昔百姓不足君孰與足水旱之災雖尚未至然君子遠覽防微慮萌老子曰人之饑也以其上食稅之多也故孝文皇帝綈袍革舄木器無文約身薄賦時致昇平今陛下聖德中興宜尊前典惟節惟約天下幸甚易曰天道無親常與善人是故高宗以享福宋景以延年四事臣仰觀天文太子不明熒惑以去年春分後十六日在婁五度推步三統熒惑今當在翼九度今反在柳三度則不及五十餘度去年八

月二十四日戊辰熒惑歷輿鬼東入軒轅出后星北東
去四度北旋復還軒轅者後宮也熒惑者至陽之精也
天之使也而出入軒轅統還往來易曰天垂象見吉凶
其意昭然可見矣禮天子一娶九女嫡媵畢具今宮人
侍御動以千計或生而幽隔人道不通鬱積之氣上感
皇天故遣熒惑入軒轅理人倫垂象見異以悟主上昔
武王下車出傾宮之女表商容之間以理人倫以表賢
德故天授以聖子成王是也今陛下多積宮人以違天

意故皇子多天嗣體莫寄詩云敬天之怒不敢戲豫方
今之福莫若廣嗣廣嗣之術可不深思宜簡出宮女恣
其姻嫁則天自降福子孫千億惟陛下丁寧再三留神
於此左右貴幸亦宜惟臣之言以悟陛下蓋善言古者
合於今善言天者合于人願訪問百僚有違臣言者
臣當苟言之罪五事臣竊見去年閏十月十七日巳丑
夜有白氣從西方天苑趨左足入玉井數日乃滅春秋
曰有星孛于大辰大辰者何大火也大火為大辰罰又

為大辰北極亦為大辰所以亭一宿而連三宿者言北
辰王者之宮也凡中宮無節政教亂逆威武衰微則此
三星以應之也罰者白虎其宿主兵其國趙魏變見西
方亦應三輔凡金氣為變發在秋節臣恐立秋以後趙
魏關西將有羗寇畔戾之患宜豫宣告諸郡使敬授人
時輕徭役薄賦歛勿妄繕起堅倉獄備守衛回選賢能
以鎮撫之金精之變責歸上司宜以五月丙午遣大尉
服干戚建井旗畫玉版之策引白氣之異於西郊責躬

求愆謝咎皇天消滅妖氣蓋以火勝金轉禍為福也六
事臣竊見今月十四日乙卯巳時白虹貫日凡日傍氣色
白而純者名為虹貫日中者侵太陽也見於春者政變
常也方今中官外司各各考事其所考者或非急務又
恭陵火災主名未立多所收捕備經考毒尋火為天戒
以悟人君可順而不可違可敬而不可慢陛下宜恭已
內省以備後災凡諸考案并湏立秋又易傳曰公能其
事序賢進士後必有喜反之則白虹貫日以甲乙見者

則謹在中台自司徒居位陰陽多謬久無虛已進賢之策天下興議異人同咨且立春以來金氣再見金能勝木必有兵氣宜黜司徒以應天意陛下不早禳之將負

臣言遺患百姓

時劉琦為司徒至陽嘉三年策免

七事臣伏惟漢興以

來三百三十九歲於詩三基

基當作暮謂以三基之法推之

高祖起亥

仲二年今在戌仲十年詩汜歷樞曰卯酉為革政午亥為革命神在天門出入候聽言神在戌亥司候帝王興衰得失厥善則昌厥惡則亡於易雄雌秘歷今值困乏

凡九二困者衆小人欲共困害君子也經曰困而不失其所其唯君子乎唯獨賢聖之君遭困遇險能致命遂志不去其道陛下乃者潛龍養德幽隱屈尼即位之元紫宮驚動歷運之會時氣已應然猶恐妖祥未盡君子思患而豫防之臣以為成仲已竟來年入季文帝改法除肉刑之罪至今適三百年宜因斯際大蠲法令官名稱號輿服器械事有所更變大為小去奢就儉機衡之政除煩為簡改元更始招求幽隱舉方正徵有道

博採異謀開不諱之路臣陳引際會恐犯忌諱書不盡
言未敢究暢臺詔顛曰對云白虹貫日政變常也朝廷
率繇舊章何所變易而言變常又言當大蠲法令革易官
號或云變常以致災或改舊以除異何也又陽嘉初建
復欲改元據何經典其以實對顛對曰方春東作布德
之元陽氣開盛而養導萬物王者因天視聽奉順時
氣宜務崇溫柔遵其行令而今立春之後考事不息秋
冬之政行乎春夏故白虹春見掩蔽日曜凡邪氣乘陽

則虹蜺在日斯皆臣下執事刻急所招殆非朝廷優寬之本此其變常之咎也又今選舉皆歸三司非有周呂之才而當則哲之重每有選用輒參之掾屬公府門巷賓客填集送去迎來財貨無已其當遷者竟相薦謁各遣子弟充塞道路開長女好門興致浮偽非所謂率繇舊章也尚書職任機衡宮禁嚴密私曲之意差不得通偏黨之恩或無所用選舉之任不如還在機密臣誠愚戇不知折中斯固遠近之倫當今之宜又孔子曰漢三

百載計歷改憲三百四歲為一德五德千五百二十歲
五行更用自春徂夏改青服絳者也自文帝省刑適三
百年而輕微之禁漸已殷積王者之法譬猶江河當使
易避而難犯也故易曰易則易知簡則易從易簡而天
下之理得矣今去奢即儉以先天下改易名號隨事稱
謂易曰君子之道或出或處同歸殊途一致百慮是知
變常而善可以除災變常而惡必致於異今年仲竟來
年入季仲終季始歷運變改故可改元所以順天道也

臣顛愚蔽不足以答聖問顛又上書薦黃瓊李固并陳
便宜四事一事孔子作春秋書正月者敬歲之始也王
者則天之象因時之序宜開發德號爵賢命士流寬大
之澤垂仁厚之德順助元氣含養庶類如此則天文
昭爛星辰顯列五緯循軌四時和睦不則太陽不光天
地混濁時氣錯逆霾霧蔽日自立春以來累經旬朔
未見仁德有所施布但聞罪罰考掠之聲夫天之應人
疾於影響而自從入歲常有蒙氣月不舒光日不宣耀

日者太陽以象人君政變於下日應於天清濁之占隨
政抑揚天之見異事無虛作豈獨陛下倦於萬機帷幄
之政有所闕歟何天戒之數見也臣願陛下發揚乾剛
援引賢能勤求機衡之寄以獲斷金之利臣之所陳輒
以太陽為先者明其不可久闇急當改正其異雖微其
事甚重臣言雖約其旨甚廣惟陛下乃眷臣章深留明
思二事孔子曰雷之始發大壯始君弱臣強從解起今
月九日至十四日大壯用事消息之卦也於此六日之

中雷當發聲發聲則歲氣和王道興也易曰雷出地奮
豫先王以作樂崇德殷薦之上帝雷者所以開發萌芽
辟陰除害萬物須雷而解資雨而潤故經曰雷以動之
雨以潤之王者從寬大順春令則雷應節不則發動於
冬當震反潛故易傳曰當雷不雷太陽弱也今蒙氣不
除日月變色則其效也天網恢恢疏而不失隨時進退
應政得失大人者與天地合其德與日月合其明璇機
動作與天相應雷者號令其德生養號令殆廢當生而

殺則雷反作其時無歲

雷以冬鳴則歲飢也

陛下若欲除災招祉

順天致和宜察臣下尤酷害者加斥黜以安黎元則大

皓悅和靈聲乃發

大皓天也

三事去年十月二十日癸亥太

白與歲星合明於房心太白在北歲星在南相離數寸

光芒交接房心者天帝明堂布政之宮孝經鈎命決曰

歲星守心年穀豐尚書洪範記曰月行中道移節應期

德厚受福重華留之重華者謂歲星在心也今太白從

之交合明堂金木相賊而反同合此以陰陵陽臣下專

權之異也房心東方其國主宋石氏經曰歲星出左有
年出右無年今金木俱東歲星在南是為出右恐年穀
不成宋人饑也陛下宜審詳明堂布政之務然後妖異
可消五緯順序矣四事易傳曰陽無德則旱陰僭陽亦
旱陽無德者人君恩澤不施於人也陰僭陽者祿去公
室臣下專權也自冬涉春訖無嘉澤數有西風反逆時
節朝廷勞心廣為祈禱薦祭山川暴龍移市臣聞皇天
感物不為偽動災變應人要在責己若令雨可請降水

可禳止則歲無隔并太平可待然而災害不息者患在此也
立春以來未見朝廷賞錄有功表顯有德存問孤寡賑恤
貧弱而但見雒陽都官奔車東西收繫纖介牢獄充盈
臣聞恭陵火虜比有光曜明此天災非人之咎丁丑大
風掩蔽天地風者號令天之威怒皆所以感悟人君忠
厚之戒又連月無雨將害宿麥若一穀不登則饑者十
三四矣陛下誠宜廣被恩澤貸贍元元昔堯遭九年之
水人有十載之蓄者簡稅防災為其方也願陛下早宣

德澤以應天功若臣言不用朝政不改者立夏之後乃
有澍雨於今之際未可望也若政變於朝而天不雨則
臣為誣上愚不知量分當鼎鑊書奏特詔拜郎中辭病
不就即去歸家至四月京師地震遂陷其夏大旱秋鮮
卑入馬邑城破代郡兵明年西羌寇隴右皆畧如顛言
耳

杜喬為大司農順帝時梁冀子弟五人及中常侍等以
無功並封喬上書諫曰陛下越從藩臣龍飛即位天人

屬心萬邦攸賴不急忠賢之禮而先左右之封傷善害
德興長佞諛臣聞古之明君褒罰必以功過末世闇主
誅賞各緣其私今梁氏一門宦者微孽並帶無功之紱
裂勞臣之土其為乖濫胡可勝言夫有功不賞為善失
其望姦回不詰為惡肆其凶故陳資斧而人靡畏班爵
位而物無虧苟遂私道豈伊傷政為亂而已喪身亡國
可不慎哉書奏不省

周舉永和末為諫議大夫時連有災異順帝詔舉於顯

親門問以變青舉對曰陛下初立遵修舊典興化致政
遠近肅然頃年以來稍違於前朝多寵倖祿不序德觀
天察人準今方古誠可危懼書曰僭常賜若夫僭差無
度則言不從而下不正陽無以制則上擾下竭宜密嚴
勅州郡察彊宗大姦以時擒討其後江淮猾賊周生徐
鳳等處處並起如舉所陳

劉陶為太學生桓帝時大將軍梁冀專朝而桓帝無子
連歲凶荒饑菑異數見陶上疏陳事曰臣聞人非天地

無以為生天地非人無以為靈是故帝非人不立人非
帝不寧夫天之與帝帝之與人猶頭之與足相須而行
也伏惟陛下年隆德茂中天稱號襲常存之慶循不
易之制目不視鳴條之事耳不聞檀車之聲天災不
有痛於肌膚震食不即損於聖體故茂三光之謬輕
上天之怒伏念高祖之起始自布衣拾暴秦之敝追亡
周之鹿合散扶傷克成帝業功既顯矣勤亦至矣流福
遺祚至於陛下陛下既不能增明烈考之軌而忽高祖

之勤妄假利器委授國柄使羣醜刑隸芟刈小民彫敝
諸夏虐流遠近故天降衆異以戒陛下陛下不悟竟令
虎豹窟於麀場豺狼乳於春園斯豈唐咨禹稷益典
朕虞議物賦上蒸民之意哉又令牧守長吏上下交競
封豕長蛇蠶食天下貨殖者為窮寃之魂貧餒者作饑
寒之鬼高門獲東觀之幸豐室罹妖叛之罪死者悲
於寃宥生者戚於朝野是愚臣所為咨嗟長懷歎息者
也且秦之將亡正諫者誅諛進者賞嘉言結於忠舌國命

出於讒口擅閭樂於咸陽授趙高以車府權去已而不
知威離身而不顧古今一揆成敗同勢願陛下遠覽強
秦之傾近察哀平之變得失昭然禍福可見臣又聞危
非仁不扶亂非知不救故武丁得傳說以消鼎雉之蓄
周宣用申甫以濟夷厲之荒竊見故冀州刺史南陽朱
穆前烏桓校尉臣同郡李膺皆履正清平貞高絕俗穆
前在冀州奉憲操平摧破姦黨民清萬里歷典牧守
正身率下及掌戎馬威揚朔北斯實中興之良佐國家

之柱臣也宜還本朝夾輔王室上齊七曜下鎮萬國臣
敢吐不時之義於諱言之朝猶冰霜見日必至消滅臣
始悲天下之可悲今天下亦悲臣之愚惑也書奏不省
袁著為郎中年十九見梁冀凶縱不勝其憤乃詣闕上
書曰臣聞仲尼歎鳳鳥不至河不出圖自傷卑賤不能
致也今陛下居得致之位又有能致之資而和氣未應
賢愚失序者執分權臣上下壅隔之故也夫四時之用
功成則退高爵厚寵鮮不致留今大將軍位極功成可

為至戒宜遵懸車之禮高枕願神傳曰木實繁者披枝
害心若不抑損權盛將無以全其身矣左右聞臣言將
側耳切齒臣特以童蒙見拔故敢忘忌諱昔舜禹相戒
無若丹朱周公戒成王無若殷王紂願除誹謗之罪以
開天下之口書奏不省

楊秉為侍中尚書時桓帝微行私過幸河南尹梁裔府
舍是日大風拔樹晝昏秉上疏諫曰臣聞瑞繇德至菑
應事生故傳曰禍福無門唯人自招天不言語以菑異

謹告是以孔子迅雷風烈必有變動詩云敬天之威不敢驅馳王者至尊出入有常警蹕而行靜室而止自非郊廟之事則鸞旗不駕故詩稱自郊徂宮易曰王假有

廟致孝享也諸侯如臣之家春秋尚列其誠

齊莊公如崔杼家為

崔杼所殺況以先王法服而私出槃游降亂尊卑等威無序

侍衛守空宮級璽委女妾設有非變任章之謀上負先帝下悔靡及臣奕世受恩得備納言又以薄學充在講勸特蒙哀識見焯日月恩重命輕義使士死敢憚推折

畧陳其愚帝不納

應奉為司隸校尉桓帝時田貴人見幸帝有建立之議奉以田氏微賤不宜超登后位上書諫曰臣聞周納狄女襄王出居乎鄭漢立飛燕成帝裔嗣泯絕母后之重興廢之所因宜思關雎之所求遠五禁之所忌帝納之李雲為白馬令桓帝延熹二年中常侍單超等五人皆以誅梁冀功並封列侯專權選舉又立掖庭民女亳氏為皇后數月間后家封者四人賞賜巨萬是時地數震

裂衆苗頻降雲素剛憂國將危心不能忍乃露布上

書移副三府曰臣聞皇后天下母德配坤靈得其人則

五氏來備

五氏即史記所謂庶徵曰雨曰暘曰燠曰寒曰風五者來備也

不得其人則

地動搖宮比年災異可謂多矣皇天之戒可謂至矣高

祖受命至今三百六十四歲君期一周當有黃精代見

姓陳項虞田許氏不可令此人居太尉太傅典兵之官

舉厝至重不可不慎班功行賞宜應其實梁冀雖持權

專擅虐流天下以罪行誅猶召家臣搯殺之耳而猥封

謀臣萬戶以上高祖聞之得無見非西北列將得無解

體列將謂皇
甫規等

孔子曰帝者諦也今官位錯亂小人諂進

財貨公行政化日損尺一拜用不經御省是帝欲不諦
乎帝得奏震怒下有司逮雲死黃門獄中

朱穆桓帝時坐忤宦者趙忠輸作左校赦出居家數年
在朝諸公多有相推薦者於是徵拜尚書穆既深疾宦
者及在臺閣旦夕共事志欲除之乃上疏曰案漢故事
中常侍叅選士人建武以後乃悉用宦者自延平以來

浸益貴盛假貂璫之飾屢常伯之任天朝政事一更其
手權傾海內寵貴無及子弟親戚並荷榮任故放濫驕
溢莫能禁御凶狡無行之徒媚以求官恃勢怙寵之輩
漁食百姓窮破天下空竭小人愚臣以為可悉罷省遵
復往初率繇舊章更選海內清淳之士明達國體者以
補其處即陛下可為堯舜之君衆僚皆為稷契之臣兆
庶黎民蒙被聖化矣帝不納後穆進見口復陳曰臣聞漢
家舊典置侍中中常侍各一人者尚書事黃門侍郎一

人傳發書奏皆用姓族自和熹太后以女主稱制不接
公卿乃以閹人為常侍小黃門通命兩宮自此以來權
傾人主窮困天下宜皆罷遣博選耆儒宿德與參政
事帝怒不應穆伏不起左右傳出聲傳良久乃趨而去
自此中官數因事稱詔詆毀之穆素剛不得意居無幾
憤邁發疽卒

陳蕃為光祿勳桓帝時封賞踰制內寵猥盛蕃上疏諫
曰臣聞有事社稷者社稷是為有事人君者容悅是為

今臣蒙恩聖朝備位九列見非不諫則容悅也夫諸侯
上象四七垂耀在天下應分土藩屏上國高祖之約非
功臣不侯而聞追錄河南尹鄧萬世父尊之微功更爵
尚書令黃門雋先人之絕封近習以非義授邑左右以
無功傳賞授位不料其任裂土莫紀其功至乃一門之
內侯者數人故緯象失度陰陽謬存稼用不成民用不
康臣知封事已行言之無及誠欲陛下從是而止又比
年收歛十傷五六萬人饑寒不聊生活而採女數千食

肉衣綺脂油粉黛不可貲計鄙諺言盜不過五女門以女貧家也今後宮之女豈不貧國乎是以傾宮嫁而天下化楚女悲而西宮菑且聚而不御必生憂悲之感以致兵革水旱之困夫獄以禁止姦邪官以稱才理物若法虧於平官失其人則王道有缺而今天下之論皆謂獄繇怨起爵以賄成夫不有臭穢則蒼蠅不飛陛下宜採求得失擇從忠善尺一選舉委尚書三公使褒責誅賞各有所歸豈不幸甚帝頗納其言為出宮女五百餘

人但賜雋爵關內侯而萬世南鄉侯延熹六年車駕幸

廣成較獵

廣成苑名

蕃上疏諫曰臣聞人君有事苑囿唯仲

秋西郊順時講武殺禽助祭以敦孝敬如或違此則為

肆縱故皋陶戒舜無放逸遊周公戒成王無槃於遊田

虞舜成王猶有此戒況德不及二王者乎夫安平之時

尚宜有節況當今之世有三空之危害田野空朝廷空

倉庫空是謂三空加兵戎未戢四方離散是陛下焦心

毀顏坐以待旦之時也豈宜揚旗耀武騁心輿馬之觀

乎又前秋多雨民始種麥今失其勸種之時而令給驅禽除路之役非賢聖恤民之意也齊景公欲觀於海放乎瑯琊晏子為陳百姓惡聞旌旗輿馬之音舉首頰眉之憾景公感之不行周穆王欲肆車轍馬跡祭公謀父為誦祈招之詩以止其心誠惡逸遊之害人也書奏不納

襄楷平原人桓帝時宦官專朝政刑暴濫又比失皇子灾異尤數楷自家詣闕上疏曰臣聞皇天不言以文象

設教堯舜雖聖必歷象日月星辰察五緯所在故能享
百年之壽為萬世之法臣竊見去歲五月熒惑入太微
犯帝座出端門不軌常道其閏月庚辰太白入房心犯
小星震動中耀中耀天王也傍小星者天王子也夫太
微天廷五帝之座而金火罰星揚光其中於占天子凶
又俱入房心法無繼嗣今年歲星久守太微逆行西至
掖門還切執法歲為木精好生惡殺而淹留不去者咎
在仁德不修誅罰太酷前七年十二月熒惑與歲星俱

入軒轅逆行四十餘日而鄧皇后誅其冬太寒殺鳥獸
害魚鼈城傍竹柏之葉有傷枯者臣聞師曰柏傷竹枯
不出三年天子當之今雒陽城中人夜無故叫呼云有
火光人聲正誼於占亦與竹柏同自春夏以來連有霜
電及大雨雷而臣作威作福刑罰急刻之所感也太原
太守劉瓚南陽太守成瑨志除姦邪其所誅剪皆合人
望而陛下受閹豎之譖乃遠加老逮三公上書乞哀瓚
等不見採察而嚴被譴讓憂國之臣將遂杜口矣臣聞

殺無罪誅賢者禍及三世陛下即位以來頻行誅伐梁
寇孫鄧並見族滅其從坐者又非其數李雲上書明主
所不當諱杜衆乞死諒以感悟聖朝曾無赦宥而并被
殘戮天下之人咸知其寃漢興以來未有拒諫誅賢用
刑太深如今者也求平舊典誅當重論皆須冬獄先請
後刑所以重人命也頃數十歲以來州郡玩習又欲避
請讞之煩輒託疾病多死牢獄長吏殺生自己死者多
非其罪魂神寃結無所歸訴淫厲疾疫自此起昔文

王一妻誕致十子今宮女數千未聞慶育宜修德省行
以廣螽斯之祚又七年六月十三日河內野王山上有
龍死可長數十丈扶風有星隕為石聲聞三郡夫龍形
狀不一小大無常故易況之大人帝王為符瑞或聞河
內龍死諱以為蛇夫龍能變化蛇亦有神皆不當死者
秦之將衰華山神操壁以授鄭客曰今年祖龍死始皇
逃之死於沙丘王莽天鳳二年訛言黃石山宮有死龍
之異後漢誅莽光武復興虛言猶然況於實邪夫星辰

麗天猶萬國之附王者也下將畔上故星亦畔天石者
安類墜者失勢春秋五石隕宋其後襄公為楚所執秦
之亡也石隕東郡今隕扶風與先帝園陵相近不有大
喪必有畔逆案春秋以來及古帝王未有河清及學門
自壞者也臣以為河者諸侯位也清者屬陽濁者屬陰
河當濁而反清者陰欲為陽諸侯為帝也大學天子教
化之宮其門無故自壞者言文德將喪教化廢也京房
易傳曰河水清天下平今天垂異地吐妖人厲疫三者

並時而有河清猶春秋麟不當見而見孔子書之以為異也臣前上琅琊宮崇受于吉神書不合明聽臣聞布穀鳴於孟夏蟋蟀吟於始秋物有微而至信人有賤而言忠臣雖至賤誠願賜清問極盡所言書奏不省十餘日復上書曰臣伏見太白北入數日復出東方其占當有大兵中國弱四夷強臣又推步熒惑今當出而潛必有陰謀皆繇獄多寃結忠臣被戮德星所以久守執法亦為此也陛下宜承天意理察寃獄為劉瓚成瑨虧除

罪避追錄李雲杜衆等子孫夫天子事天不孝則日食
星闕比年日食於朔三光不明五緯錯戾前者宮崇所
獻神書專以奉天地順五行為本亦有興國廣嗣之術
其文易曉參同經典而順帝不行故國嗣不興孝冲孝
質類世短祚臣又聞之得主所好自非正道神為生虐
故周衰諸侯以力征相高於是夏育申休宋萬彭生任
鄙之徒生於其時殷紂好色妲己是出葉公好龍真龍
游廷今黃門常侍天刑之人陛下愛待兼倍常寵係嗣

未兆豈不為此天官宦者星不在紫宮而在天市明當
給使主市里也今乃反處常伯之位實非天意又聞宮
中立黃老浮屠之祠此道清虛貴尚無為好生惡殺省

慾去奢今陛下嗜慾不去殺罰過理既乖其道豈獲其

祚哉或言老子入夷狄為浮屠

或言當時老子四入夷狄始為浮屠之化

屠不三宿桑下

言浮屠之人寄桑下者不經三宿便即移去也

不欲久生恩愛

精之至也天神遣以好女浮屠曰此但革囊盛血遂不
眄之其守一如此乃能成道今陛下媼女艷婦極天下

之麝甘肥飲美殫天下之味奈何欲如黃老乎書上即
詔尚書問狀楷曰臣聞古者本無宦官武帝末春秋高
數游後宮始置之耳後稍見任至於順帝遂益繁熾今
陛下爵之十倍於前至今無繼嗣者豈獨好之而使之
然乎尚書上其對坐論司寇

冊府元龜卷五百三十七